

武定府志

導民不因其俗雖聖哲無以爲治然聽民之自爲之
習尚相沿又將駸駸而無所底奢示儉儉示禮所
嚮因其勢而利導之也古者命太史陳詩以觀民風
命市納賈以觀民之所好惡所以審則宜類而經紀
其政教也尚書戒奇伎淫巧賈生謂富民牆屋被文
繡以是爲民俗之病由是以思物產之豐嗇而風俗
之異清即隨之殆相爲表裏者歟正郡素稱醇樸君
子知廉耻而畏清議小人樂耕桑而重犯法又其地
鮮珍奇玩好如史記所謂山西饒穀蘆山東多魚鹽



江南多枏梓金錫丹砂珠犀而茲郡所產不及十之
三四民生其間亦鮮通商逐末惟是女勤紡紆男效
耕耘以從事於南畝之間而已然而節儉者禮讓之
本也烹葵剥棗載咏豳風包鼈膾鯉曾歌六月當塲
圖旣滌之餘殺羔羊稱兕觥躋堂稱祝以抒其忠愛
之忱採風者輶軒戾止有不表揚懿美拜手以上告
當寧也哉有司牧之責者物土之宜以勤恤民隱予以臚
民孔易矣志風物

正定府志卷之十一

風物上

風俗

風俗

班固曰在上者統理人倫移其本而易其末必有以之虛中和而後王教成也由斯言之風俗何常亦視上之轉移而已我

朝統一海宇聲教誕敷

聖天子仁漸義摩淪肌浹髓正郡密邇邦畿觀光倍切食舊德而服先疇旣已不介而孚矣蘇過庭有云獷悍本彊之習可變爲禮義廉恥之風不信然歟吾聞之

大道隱而詐僞滋質勝則慙以野俠勝則蕩以訐奢
麗之極則僭而無章風俗之漓豈一朝一夕之故哉
其由來漸已司是土者誠能休養生息以禮讓爲治
推廣

皇仁勤宣

德意使兆民生逢

盛世相安於食德飲和之化以仰副

元后甄陶之盛意將見言孝言慈言恭言友者徧洽於窮
鄉僻壤也余將拭目而觀德化之成焉

趙中山地薄人衆民俗懷急仰機利而食丈夫相聚遊

戲悲歌忼慨

史記貨殖列傳

趙地椎剽掘冢彈弦跼躡游媚富貴徧諸侯之後宮

前漢

書地

理志

恒山趙郡人性多敦厚務在農桑好尚儒學而傷於遲

重前代稱冀幽之士鈍如錐蓋取此焉重氣俠好結

朋黨亦出於仁義

隋書地理志

性緩尚儒仗義任俠

唐杜祐通典

質厚少文多專經術

宋史地理志

獷悍木彊之習可變爲禮義廉耻之風

宋蘇過庭送孫誨若序

當燕趙之交土廣俗雜人習文武雄於河朔

明鄧元錫函史

風物繁衍地廣氣豪爲文彬彬爲武赳赳

正定廳壁記

文武將相之儲經術詞章之藪

燕南題名記

人物雄豪

明統志

士平民強英傑所利

舊通志

土平水深俗多質樸前代稱冀幽之士鈍如椎蓋信有

此郡舊志

正定爲天下脊背古稱四戰之地其民習兵故秦人志

吞列國必折天下之脊而曹操袁紹輩所以積計累

思枕戈競爭者也

同上

薦紳先生抗言屬志好尚儒學猶有先王遺風

正定縣志

地秀人傑風淳俗美號稱禮義之邦

明程師伊行唐文廟記

民安儉陋冠昏蜡社外無游逸之飲

靈壽縣志

士風恥入公門民俗多尙淳樸從令如響質任自然

平山

舊志

文物鮮華庶幾齊魯之風

唐李巽元氏記

俗尙祈禱崇信鬼神

元氏舊志

士重科目民樂耕桑

元氏縣志

風氣攸萃禮義漸興第慷慨輕生剛毅任俠信鬼尙祈

嗜遊弛業猶不免燕趙之故俗

無極縣志

居太行之東人物豪雄多慷慨尙義節居民急農桑崇

禮讓輸納不敢愆期服役如趨父事

藁城縣志

正定爲恒陽首邑邑志謂有先王遺風而班史曰姦巧
宋史曰強忮魏令則病其父子毀譽唐韓昌黎有言
風俗與化移易吾惡知夫今不異於古所云耶茲就
所見聞者言之士知讀農知耕工商無奇淫老嫗弱
息不廢女紅冠禮士大夫家或行之婚禮多不親迎
喪尙佛祭非縉紳世祿遇死生忌辰不設主不享祀
惟廟會則絲竹旗亭老少徵逐婦女尤甚歲旱人帶
柳枝城市村墟鑼鼓無虛日雨乃止俗儉男女遇禮
節易服旣事藏之或親朋有紅白事輒交相伙助急

輸將亦無私負有控債欠者非市井游惰卽劣生衙役餘無有也歲時元旦夙興拜天地祖宗及尊長畢親友交相賀數日始定立春設春盤春餅曰嘗春元霄陳脯醴設餅炙爲小燈數百盞燎於中庭市井簫鼓喧闐銀燈火樹游人往來至夜分不輟二十五日爲填倉日以陰晴占歲事二月二日煎油糰薰百蟲以灰撒地自井竈至臥室謂之引龍清明男女皆插柳枝挈脯醴楮錢祀先隴四月八日戴槐芽以祛眼疾寺宇爲浴佛會端午門懸蒲艾佩朱符小兒絲絲繫臂爲續命縷親友以角黍相餽

遺 六月六日曝衣中庭云可辟蠹士則取書畫晒之是日俗多壺漿祭塚 七夕陳瓜果祀天孫士女穿針乞巧 七月十五攜榼掃墓以麻穀數莖掛隴上謂之送麻穀寺廟多作盂蘭會 中秋親友以果肴月餅相餉遺月下宴飲夜分始罷 重陽製花糕携菊酒出郭野飲曰登高 十月朔日剪綵衣焚于墓側謂之送寒衣 臘月八日雜諸果於米豆煮臘粥二十四日掃舍宇飴糖祀竈人家多以是日換門符曰交年 除夕男女守歲燈燭竟夕爆竹庭中以祓不祥自二十四日至是民間競相婚娶鼓吹不絕

往來塞塗習俗固然非一朝一夕之故矣

按彭乘墨客揮犀載鎮陽諸節最重寒食至日皆着新衣過此必於來歲茲日始易唐人沈佺期亦有鎮陽新甲子何日是清明之句今其風久變詢之父老無有能言之者蓋時移而俗易由來遠矣

獲鹿通商賈冠蓋往來人習交際然性樸質士夫彬彬多畏法齊民亦知尙廉恥其貧者業於傭鮮游手亦不解末作關外有棧房大都皆晉人爲之蓋自唐范澄以敦實化民所從來遠矣秋後競作社會醵錢無虛日計其一歲之入耗且及半不少惜喪葬必作僎事執紼者送旗旛幢幃主家盛饌娛賓醉飽而後發引此則車馬輻輳之塲殆有不能免於淫靡之陋習

也與歲時禮儀與正定同元宵次日遊山水以祛百病穀雨貼禁蝎符臘月八日婦女歸寧小異

井陘山多地少民食恒憂不給而俗尙氣多真率有古者直道之存士兼稼圃爲文亦有思路然不如獲邑之就範意者山川之氣尙鬱而未開歟抑或井人貧而獲人富師承固殊歟農家險阻奇零得尺得寸其濱河者置水磨於急流秋漬槐櫝之葉以興冬草木黃落則入山樵采市上奇巧不居多康瓠甌甌胡餅刺繡之屬風之敝者婚同姓乘喪扶娶殯葬則酒肉宴賓以爲榮近雖知變恐愚民未能衆著於禮教之

大閑宜以時禁歲時與正邑畧同惟北鄉於上元日
持石執仗打麻郎神至於鬪死而不悔誠惡習也畏
法稍戢革面非真革心不可不防其復作

阜平堂防山邑地阻人稀

貧家多以

棗爲糧自營田例開差無遺利生齒亦視前較繁溫
南北等社宜桑近亦有育蠶者然性鈍不解組織蠶
出新絲薄有所償卽大喜過望其杭稻之利亦皆晉
人擅之地有撲虎救母掀石拒寇之遺事意瘠土之
民莫不嚮義理固然與歲時禮儀與各邑相似惟文
風最靡是宜加意

樂城地平土沃介於往來之通士力於農男勤紡紉婦人樂赴訴庶人多在官者土產木綿商賈雲至彈弦跕躡風不易戢然樂完課急公令帖束官法號易理也歲時正月五日掃堂宇委土戶外曰送五窮二月二日俗稱龍擡頭以時近驚蟄也七月十五日農人掛紙錢於田畔曰掛地衣十一月至日埋穀種於地至次年元旦取驗歲宜餘則畧同

行唐地多沙磧居民鮮少雖以唐堯稱縣箕穎傳踪末俗遷流古風尠矣明初衿士無學舍閭閻鮮塾師經官師振作鼓舞科名漸興嘉靖後又靡近頗知學然

積習相沿未能盡化如疾病不用醫藥而事覲巫覡
葬不循周禮而重佛事墓無誌銘雲祔不能辨高曾
之塚家無譜牒子孫不能詳祖父之名本原之義需
教孔殷也歲時三月初三十月十五廟會甚盛四方
貨物雲集麇至旬日方散詰奸禁暴在司牧者留意
焉其餘禮俗同

靈壽最稱瘠壤民安儉陋冠婚社蜡外無遊佚之飲土
地磽确力費而獲薄居人無蓋藏豐歲苴飯藿羹而
已鄉飲歲舉讀法可觀士勤誦讀兼習耕鋤有奔競
逐末者人咸訾之家貧鮮興作工多遷業商無土著

皆藉外來敝俗則因喪扶娶葬時多拘忌尙浮屠間
有賭博女巫牙僧之風今則漸戢然說者謂外華中
枯去節儉稍遠是又待導之使返也歲時上元不張
燈端午中秋重陽冬至尙餽送宴樂

平山風土淳厚士耻入公門民多樸邀不事奔競其遠
處山村者戇愚尤甚鬻薪芻多不識價遇徭役寧賣
桑棗以辦有誣罔之者至不能辨蒼素處已以儉待
人以豐從令如響質任自然明季侈靡漸啓富家喜
宴會貧者亦踵相效尤而又節遭兵戈水旱之患流
亡遂多

本朝除水冲沙壓地糧額征並頻蒙

恩蠲積困旣蘇民遂復業由是士讀農耕冠婚喪祭多循
禮節洵乎轉移之有本也歲時習尚與各邑畧同

元氏地僻風淳士礪廉隅男女力耕織俗儉歲入有餘
糧粗糲自給鬻其美好者於鄰邑邑志云樸樸餘風
不改童稚爲婚鷄豚娶婦之舊蓋其褊嗇使然矣然
喜報賽西成之後簫鼓盈村倘所謂尙鬼佞佛燕趙
舊俗與歲時正月十二日婦女出聚門首謂之躲
鼠十六日夜半杵院謂之搗虛耗二十日用灰畫窖
置五穀於中謂之小添倉二月二日畫屋擊梁以禁